

ZARAUZKO EMAKUMEEN ETA GIZONEN BERDINTASUNERAKO UDAL KONTSEILUAREN ERREGELAMENDUA

1. artikulua.- IZAERA

1.- Zarauzko emakumeen eta gizonen berdintasunerako udal kontseilua organo aholkularia, kontsultarakoa, informatzailea eta ekintzen sustatzailea eta behatzailea da, horien bidez emakumeen eta gizonen arteko aukera berdintasuna lortzeko eta emakumeen partaidetza bultzatzeko, udalerriko bizitza politikoan, kulturalean, ekonomikoan eta sozialean.

Udalaren gobernu-organoek aintzat hartuko dituzte kontseiluak egindako proposamenak eta hartutako erabakiak eta organo horiek erantzun arrazoitua eman beharko diete baztertzeko edo aldatzeko diren erabaki edo proposamen guztiei.

2.- Erregelamendu honek eta aplikatzekoak diren gainerako xedapenek arautuko dute kontseilua.

2. artikulua.- KONTSEILUAREN HELBURUAK

Berdintasunerako kontseiluak oinarritzko helburu hauek izango ditu:

- Herritarren partaidetza eta bereziki Zarauzko emakumeena bultzatu udalerriko arlo politikoan, kulturalean, sozialean eta ekonomikoan, ordezkatzeko dituzten elkarte eta erakunde bidez.
- Emakumeen lanaren aitorpena bultzatu, bai aukera berdintasuna lortzeko, bai emakumeen eskubideak defendatzeko, eta bai gizarteko hainbat arlotan benetan parte hartzeko.
- Emakumeen asoziazionismoa sustatu.
- Udal politikak eta zerbitzuak emakumeen eta gizonen aukera berdintasuna berma dezaten behatu.
- Emakumeen eta gizonen partaidetzaren oreka kualitatibo eta kuantitatiboa bultzatu hainbat arlotan: udal bizitzan, kulturaren, politikan, gizartean, lanean, ekonomian, etab.

- Udaleko berdintasun politikari buruzko hausnarketarako eta iritziak elkartrukatzeko gune izatea.
- Zarauzko emakumeen beharrak identifikatzea.
- Politika eta mugimendu feministari buruzko hausnarketarako topaleku izatea.

3. artikulua.- FUNTZIOAK

1.- Aurreko artikuluan zerrendatutako helburuak betetzeko, kontseiluak ondorengo funtzioak beteko ditu:

- Organo aholkulari eta kontsultarako gisa, udal politika bideratzea eta kontrastatzea, emakumeen eta gizonen arteko benetako berdintasuna lortzeko.
- Aukera berdintasuneko plan orokorra egin eta garatu dadin bultzatu, horren betekizun mailaren jarraipena egin eta ebaluazioan parte hartu.
- Landu behar den gaiaren arabera, kontseiluan Udaleko beste departamentuetako teknikariek aholkulari gisa parte hartzea egokia izan daitekeen aztertu, eta behar izanez gero, partaidetza hori proposatu.
- Aukera berdintasunarekin lotutako gaietan, udalaren eta herritarren edo kolektiboen arteko bitartekari lanak egin, euren eskaerak, proposamenak eta iritzi ezberdinak jaso eta kudeatu.

2. Zarauzko Udalak beharrezko informazioa eta bitarteko egokiak jarriko ditu kontseiluaren funtzioak betetzeko eta behar den bezala funtzionatzeko.

3. Kontseiluaren zeregina txostenak, irizpenak, proposamenak eta eskaerak egitea izango da.

4. artikulua.- KONTSEILUAREN OSAKETA

Kontseiluko partaide izan daitezke hitzarekin eta botoarekin honakoak:

1.- Berdintasun departamentuko zinegotzi arduraduna, edo bere ordeiz izendatzen duena, kontseiluko lehendakari lanetan.

2.- Berdintasun departamentuko teknikaria, edo bere ordezkari izendatzen duena, kontseiluko idazkari lanetan.

3.- Ondoren zerrendatutako elkarteak; elkarte bakoitzeko gehienez 2 ordezkari (titularra eta ordezkoa):

- Emakumeen elkarte edo erakundeak
- Eskubide berdintasunen alde lan egiten duten elkarte edo erakundeak
- Gizarte izaerako beste elkarteak
- Auzo elkarteak

Elkarte edo erakunde horiek guztiek honako baldintzak bete beharko dituzte:

- a) Beren jarduketara eremua Zarautz izatea
- b) Emakumeen eta gizonen eskubide eta aukera berdintasunaren defentsan jarduerak egitea
- c) Erregelamendu honetan jasotako printzipio eta helburuak onartu eta horiekin konprometitzea.
- d) Irabazi-asmorik ez izatea

4.- Udalerrian ordezkari izaten duten sindikatu eta erakundeetako emakume edo berdintasun ataleko bi ordezkari (titularra eta ordezkoa) gehienez.

5.- Banaka eta irabazi asmorik gabe berdintasunaren aldeko jarduerak egiten dituzten pertsonak, gaiarekin interes egonkorra dutela adierazten dutenak.

6.- Kontseiluak beste pertsona edo erakunde batzuen lankidetzara eduki ahal izango du, aholkulari gisa, hitzarekin baina botorik gabe bilkuretan parte hartzen dutenean.

5. artikulua.- KONTSEILUAN SARTZEA

1. Aurreko artikuluan aipatutako elkarte eta erakundeek kontseiluan sartzeko eskatu behar dute, lehendakariari zuzendutako idatzi baten bidez. Eskararekin batera ondorengo agiriak aurkeztu beharko dituzte:

- Parte hartzea eskatzeko inprimakia, ongi beteta.
- Elkarte edo erakundearen idatzia, bere ordezkari izateko eskatzailearen eta ordezkari pertsonaren esku uzten duela adierazten duena.

2.- Parte hartu nahi duten banakako pertsonen ondorengo agiria aurkeztu beharko dute:

- Parte hartzea eskatzeko inprimakia, ongi beteta.

3.- Pertsonen edo erakundeen datuak aldatzen badira, kontseiluko idazkaritzari jakinaraziko zaizkio, gertatzen direnetik hilabeteko (1) epean.

4.- Kontseiluan parte hartu nahi duenak edozein momentuan egin dezake sartzeko eskaera.

6. artikulua.- KONTSEILUKO PARTAIDE IZATEARI UZTEA

1.- Kontseiluko kide izateari utziko zaio ondorengo arrazoiengatik:

- Bere borondatez
- Elkartea edo erakundea desegin delako
- 4. artikuluan eskatutako baldintzetako bat betetzen ez delako
- Justifikaziorik gabe bileretara ez joateagatik (hiru aldiz jarraian edo bost txandatutan)
- Kontseiluko printzipioen aurkako jarrera eduki edo jarduerak egiteagatik, gainerako kide gehienen iritzirako.
- Erregelamendu hau behin eta berriz hausteagatik

2.- Kontseiluak hartuko du kide izateari uzteko erabakia, inplikaturako elkarte edo pertsonari entzun eta gero.

7. artikulua.- KONTSEILUKO ORGANOAK

Emakumeen eta gizonen berdintasunerako kontseiluak ondorengo organoak izango ditu:

1.- Lehendakaritza:

Kontseiluaren lehendakaritzak ondorengo funtzioak beteko ditu:

- Kontseilua publikoaren aurrean ordezkatu
- Kontseiluaren bilkurak deitu eta horietan buru egin
- Eztabaidak bideratu eta zuzendu
- Kontseiluko kideek proposatuta, kontseiluan partaide berriak sartu edo partaideei baja eman
- Bilkura bakoitzeko gai zerrenda egin
- Bozketak erabaki, berdinketa kasuetan

- Kontseiluak egindako proposamenak Udaleko Berdintasun batzordera eraman eta defendatu
- Proposamenen garapenaren berri eman kontseiluari

2.- Idazkaritza:

Kontseiluko idazkaritzak ondorengo funtzioak beteko ditu:

- Bilkuretako deialdiak prestatu eta bidali
- Bilkura guztietako aktak idatzi eta jaso
- Kontseilukideei informazioa bidali

3.- Kontseiluko kideak:

Kontseiluan parte hartzeak esan nahi du:

- Araudia onartzen duela
- Kontseiluko bileretan eztabaidatutako edukien berri emango diola bere elkarteari edo erakundeari
- Erregelamenduan jasotako funtzioak eta helburuak beteko dituela
- Bilkuretara joango dela
- Bilkuretan erabakitako konpromisoak beteko dituela

8. artikulua.- KONTSEILUAREN FUNTZIONAMENDUA:

1.- Kontseiluaren ohiko bilkurak hilean behin edo bi hiletik behin egingo dira, eta apartekoak lehendakaritzak edo kideen herenak horrela erabakitzen dutenean.

2.- Lehendakaritzak deialdiak idatziz egingo ditu; ohiko bilkuren kasuan gutxienez hiru egun lehenago, eta apartekoen kasuan bi egun aurretik.

3.- Kontseilua eratuta egoteko beharrezkoa izango da kideen erdia gehi bat bertaratzea.

4.- Lehenatasunez erabakiak denon adostasunarekin hartuko dira, eta hori ezinezkoa izanez gero, bertaratutakoen gehiengo soilez.

5.- Bilkura bakoitzaren akta egingo da, eta bertan jasoko dira bilkurara bertaratutakoen izenak, hasierako ordua, bukaerakoa, erabakitako gaiak eta, kasuan kasu, bozketen emaitzak.

6.- Lan batzordeak sortu ahal izango dira, baldin gehiengoaren iritzirako, gaiak aztertzeko beharrezkoak badira.

9. artikulua. ARAUTEGIA

Erregelamendu honetan aurreikusi ez den orotarako, indarrean dagoen legedi aplikagarria hartuko da kontuan.

EGINBIDEA.- Jasoarazteko Erregelamendu hau, hasierako izaeraz, 2009ko apirilaren 29an egindako osoko bilkuran onartu zuela Udalbatzarrak.

Zarautzen, 2009ko apirilaren 30a
Idazkaria

EGINBIDEA.- Jasoarazteko, Ordenantza honen testu osoa 2009ko uztailaren 21eko Gipuzkoako Aldizkari Ofizialean (135 zk.) argitaratu zela, eta 2009ko abuztuaren 11n sartu dela indarrean.

Zarautzen, 2009ko abuztuaren 11
Idazkaria